

ucm cymru
CYNHADLEDD
CONFERENCE
nus wales

Stadiwm Principality, Caerdydd

Amserlen yr Etholiadau 2018

Os ydych angen y ddogfen hon mewn ffurf
arall cysylltwch ag UCM ar 0845 5210 262
neu e-bostiwch events@nus.org.uk

If you need this document in another
format contact NUS on 0845 5210 262
or email events@nus.org.uk



Amserlen yr Etholiadau

Mae'r ddogfen hon yn eiddo i'r Prif Swyddog Etholiadau ac mae'n amlinellu'r rheolau a'r canllawiau sy'n perthyn i etholiadau UCM Cymru.

Mae'r rheolau a'r canllawiau canlynol yn eiddo i'r Prif Swyddog Etholiadau (PSE) a dim ond ef/hi gaiff eu dehongli. Ni fydd unrhyw beth yn y canllawiau hyn yn disodli Cyfansoddiad na rheolau UCM Cymru. Y Prif Swyddog Etholiadau sy'n gyfrifol am ddehongli'r rheolau sefydlog parthed materion sy'n ymwneud ag etholiadau.

Yn y ddogfen hon, gall cyfeiriadau at y Prif Swyddog Etholiadau hefyd berthyn i unrhyw ddirprwy a benodir.

Dylid cyfeirio unrhyw gwestiynau sy'n ymwneud â'r rheolau a'r canllawiau a amlinellir yn y ddogfen hon at y PSE drwy e-bostio conference@nus-wales.org.uk.

Rhagarweiniad gan y Prif Swyddog Etholiadau

Bydd y rheolau etholiadol hyn yn esbonio'r prosesau ar gyfer etholiadau ac yn eich caniatáu i ddewis eich arweinwyr neu i fanteisio ar y cyfle i ymgeisio eich hunan.

Mae'r ychydig dudalennau nesaf yn gosod allan y ffiniau ar gyfer y prosesau etholiadol, ond eich tasg chi fydd llunio polisiâu ar gyfer eich maniffestos, dod â chyffro i'ch trafodaethau a denu pleidleiswyr i'r blwch pleidleisio. Hoffwn ddweud yn arbennig os ydych chi'n credu na all 'rhywun fel chi' byth gael ei ethol i Bwyllgor Gwaith Cenedlaethol UCM Cymru, y Pwyllgor Gweithdrefnau Democrataidd neu rôl benodol arall oherwydd eich cefndir, eich hunaniaeth neu eich dull astudio, yna ystyriwch ymgeisio ar bob cyfrif.

Gall etholiadau fod yn agos, ond y peth pwysicaf yw bod ymgeiswyr a'u cefnogwyr yn ymdrin â nhw gyda pharch i bob myfyriwr. Os nad ydych yn sicr a ydych am sefyll neu beidio, cofiwch y bydd y pleidleiswyr wastad yn penderfynu pa ymgeiswyr maen nhw am bleidleisio drostynt, ond ni allant wneud y penderfyniad hwnnw os nad oes unrhyw un yn sefyll.

Cofion gorau,



Rheolau'r Etholiad

Mae'r Prif Swyddog Etholiadau wedi gosod allan y rheolau canlynol ar gyfer Cynhadledd UCM Cymru. Dylid nodi fod y rheolau hyn yn eiddo i'r Prif Swyddog Etholiadau neu'r sawl a benodir ganddynt, a dim ond hwy gaiff eu dehongli.

Wrth ystyried y rheolau hyn, dylai ymgeiswyr fod yn ymwybodol eu bod yn gyfrifol dros y ffordd y caiff eu hymgyrchoedd eu cynnal ac am ymddygiad eu cefnogwyr. Caiff ymgeiswyr ar gyfer etholiadau eu llywodraethu gan God Ymddygiad UCM. Gall torri'r rheolau hyn gan ymgeiswyr neu eu cefnogwyr arwain at waharddiad o'r etholiad – felly hefyd torri'r rheolau ymgyrchu hyn.

Gall ymgeiswyr gael dyfarniadau pellach ar ôl cau'r enwebiadau. Caiff y dyfarniadau hyn eu dosbarthu ymhlith yr ymgeiswyr i gyd ar yr un pryd.

Cyhoeddi enwebiadau a dderbyniwyd

Cyhoeddir manifestos y rolau cyflogedig llawn amser a rhestr sy'n cynnwys enw'r ymgeiswyr ar-lein cyn gynted â chaiff yr enwebiadau eu gwirio. Rhoddir yr wybodaeth hon i bob y Gynhadledd cynrychiolydd ar ddiwedd y cyfnod cofrestru.

Gwrthwynebu dilysrwydd yr ymgeiswyr

Gall unrhyw aelod o UCM wrthwynebu cymhwyster ymgeiswyr neu eu henwebwyr.

Ar gyfer y rolau llawn-amser, gallant wneud hyn drwy gysylltu â'r Prif Swyddog Etholiadau ar:- conference@nus-wales.org.uk cyn dydd Gwener 2 Mawrth 2018. Ar gyfer y rolau eraill, dylent gysylltu â'r Swyddog Etholiadau, neu ei ddirprwy, Nghynhadledd UCM Cymru fwy nag awr cyn pleidlais yr etholiad hwnnw.

Manifestos

Bydd gan ymgeiswyr gyfle i gyflwyno manifesto, heb fod yn fwy na 1,000 o eiriau, i gefnogi eu henwebiad. Dylech nodi fod rhaid i'r manifesto hwn fod yn ddwyieithog, h.y. yn Gymraeg ac yn Saesneg.

Mae UCM Cymru ar gael er mwyn cyfieithu manifestos. Gallwch gyflwyno eich testun yn y naill iaith. Os hoffech ddefnyddio'r gwasanaeth hwn, sicrhewch eich bod yn anfon y testun at conference@nus-wales.org.uk ar ffurf dogfen Word erbyn 12pm ar ddydd Gwener 9 Chwefror 2018.

Os ydych chi'n rhugl yn y ddwy iaith, gallwch gyflwyno fersiwn ddwyieithog o'ch manifesto os ydych chi am wneud hynny. Os ydych chi am ddefnyddio ein gwasanaeth cyfieithu, a fydddech cystal â sicrhau eich bod yn cyflwyno eich manifesto gan ddefnyddio'r broses a'r dyddiad cau uchod.

Caiff hwn ei gyfieithu a'i ddychwelyd i chi o fewn pum diwrnod gwaith o'ch cais. Caiff pob cais am gyfieithu a gyflwynir cyn y dyddiad cau ei ddychwelyd i'r ymgeisydd cyn diwedd y cyfnod enwebu.

Caiff y manifestos eu dosbarthu i holl aelodau cyfansoddol UCM Cymru.

Ni fydd unrhyw fanifesto sy'n ein cyrraedd heb enwebiad yn cyfrif fel ymgais ddilys ar gyfer yr etholiad.

Holi'r ymgeiswyr

Caiff pob ymgeisydd ar gyfer pob rôl gyfle i wneud araith etholiadol yng Nghynhadledd UCM Cymru. Bydd y Prif Swyddog Etholiadau yn gwneud trefniadau gyda Phwyllgor Gweithdrefnau Democrataidd UCM Cymru i ganiatáu sesiwn holi ac ateb ar gyfer ymgeiswyr am y rolau llawn-amser.

Bydd gan ymgeiswyr y rolau rhan amser gyfle i gael eu holi os yw trefn busnes y Gynhadledd yn caniatáu hynny. Pwyllgor Gweithdrefnau Democrataidd UCM Cymru a'r Prif Swyddog Etholiadau fydd yn penderfynu ar hyn.

Y bleidlais

Ar gyfer pob etholiad, bydd y Prif Swyddog Etholiadau yn cyhoeddi'r dull pleidleisio. Bydd y papurau pleidleisio'n dangos enwau pob ymgeisydd a'r rôl maent yn ymgeisio amdani. Bydd pleidleisio ar ffurf pleidlais gudd; bydd blychau pleidleisio mewn mannau amlwg a chaiff amser y bleidlais ei gyhoeddi ar ddechrau Cynhadledd UCM Cymru. Bydd pob cynrychiolydd yn gymwys i bleidleisio ym mhob etholiad.

Y cyfrif

Bydd y Prif Swyddog Etholiadau yn trefnu y caiff y cyfrif ar gyfer pob rôl ei gynnal yng Nghynhadledd UCM Cymru.

Gwariant

Mae gan yr ymgeiswyr ym mhob etholiad uchafswm y gallant ei wario ar eu hymgyrchoedd, a gaiff ei hysbysu unwaith y caiff yr enwebiad ei gadarnhau, ar gyfer defnyddiau cyhoeddusrwydd y gellir eu gwisgo, eu rhoi neu eu dosbarthu ymysg y cynrychiolwyr. Diffinnir defnyddiau ymgyrchu fel unrhyw beth sy'n eich hyrwyddo fel ymgeisydd neu sy'n darbwyllo eraill rhag pleidleisio dros eich gwrthwynebwyr.

Mae'r rhain yn cynnwys, ond nid ydynt yn gyfyngedig i, daflenni, posteri, baneri, crysau-T a bagiau. Mae'n bosibl y bydd gofyn i ymgeiswyr ddangos derbynebau am eu gwariant, ac mae'n bosibl y bydd angen iddynt sicrhau bod unrhyw nwyddau/gwasanaethau a dderbyniwyd ar gael i'r holl ymgeiswyr, ac nid dim ond o ganlyniad i berthynas arbennig â darparwyr.

Er enghraifft: Mae eich tad yn berchen ar gwmni argraffu ac mae'n rhoi 500 o daflenni i chi am ddim. Buasai gofyn i chi ddatgan gwariant sy'n cyfateb i gost fasnachol cynhyrchu 500 o daflenni o fewn eich cyfanswm gwario.

Er enghraifft: Rydych chi a 3 ymgeisydd arall yn rhannu cost argraffu taflenni, ac o'r herwydd, cewch bris gwell ar gynhyrchu 2,000 ohonynt. Y pris sydd rhaid i chi ei ddatgan fuasai cost 500 o daflenni heb y disgownt yn hytrach na chwarter cost y 2,000 a argraffwyd.

Rhaid i bob ymgeisydd mewn etholiad ddangos derbynebau awr cyn y cyfrif ar gyfer yr etholiad hwnnw. Ni chynhelir y cyfrif cyn y caiff y derbynebau ar gyfer pob ymgeisydd eu cyflwyno. Mae'r uchafswm y gellir ei wario ar etholiadau yng Nghynhadledd UCM Cymru fel a ganlyn:

Swyddogion llawn amser: **£200**

Swyddi gwirfoddol: **£50**

Noder: Os nad ydych yn sicr os yw eich gwariant yn cyfrif o fewn i'r ffiniau hyn, dylech wirio gyda'r Prif Swyddog Etholiadau cyn gwario unrhyw arian. Ni allwch ddefnyddio anwybodaeth fel esgus yn yr achos hwn.

E-byst a chyfryngau cymdeithasol

Gwaherddir y defnydd o unrhyw restrau e-bost swyddogol sy'n berchen i Grŵp UCM at ddibenion casglu enwebiadau neu i hysbysebu ymgeiswyr. Mae hyn yn cynnwys unrhyw rwydweithiau e-bost swyddogol a grwpiau rhwydweithio cymdeithasol ac unrhyw ddigwyddiadau. Gallai hyn gynnwys unrhyw grŵp Jisc, megis yr un ar gyfer undebau myfyrwyr Cymru; tudalen Facebook, megis tudalen ar gyfer clwb neu gymdeithas; neu grŵp Facebook, megis grŵp UCM Cymru ar gyfer swyddogion cyfredol.

Ystyrir e-byst unigol a'r defnydd cyffredinol o rwydweithiau cymdeithasol a negesyfyrddau yn gyfathrebu ar dafod lleferydd. Y tu hwnt i'r angen i barchu eu gwrthwynebwyr, mae croeso i'r ymgeiswyr ddefnyddio'r rhain fel y gwelant yn addas.



Taflenni

Gellir dosbarthu taflenni ymysg cynrychiolwyr ar unrhyw adeg yn ystod y gynhadledd, ond nid ar lawr y Gynhadledd nag yn y mannau a bennir ar gyfer blychau pleidleisio. Mae'n bosibl y bydd y Swyddog Etholiadau yn gofyn i ddosbarthwyr taflenni symud i ffwrdd neu i ymatal yn gyfangwbl os yw eu hymddygiad yn peri i'r digwyddiad fod yn anhygyrch.

Bydd penderfyniadau o ran pa ddeunydd a all fod ar lawr y gynhadledd ar ddisgresiwn y Pwyllgor Gweithdrefnau Democrataidd.

Cyfryngau myfyrwyr

Caiff ymgeiswyr fynychu sesiwn lle bydd aelodau o gyfryngau'r myfyrwyr o bob rhan o Gymru'n holi cwestiynau iddynt. Caiff y sesiwn hon ei threfnu ar eu cyfer. Sylwch nad oes gan y Swyddog Etholiadau unrhyw reolaeth dros yr hyn a gaiff ei gyhoeddi yng nghyfryngau'r myfyrwyr

Caiff ymgeiswyr eu hysbysu ymlaen llaw ynglŷn â pha bryd y cynhelir y sesiwn hon.

Ymgyrchu hygyrch

Creodd Ymgyrch y Myfyrwyr Anabl ganllawiau ar ymgyrchu hygyrch ac anogir ymgeiswyr i'w darllen.

<http://www.nusconnect.org.uk/resources/disabled/Accessible-Campaigning-in-NUS/>

Cod ymddygiad

Hoffem atgoffa ymgeiswyr eu bod nhw, fel aelodau o UCM, ynghlwm i reolau gweithredu UCM, sydd ar gael ar-lein. <http://www.nusconnect.org.uk/pageassets/about/democraticprocess>

Mae'r rheolau gweithredu'n gosod y protocol i'w ddilyn os caiff unrhyw reolau disgyblaeth eu torri. Gall hynny gynnwys (ond nid yw'n gyfyngedig i) fygwth neu aflonyddu ar unrhyw berson arall; ymosod ar unrhyw un arall; difrodi eiddo; gweithredu'n groes i Bolisiau Cyfle Cyfartal UCM; gweithredu heb ystyried diogelwch eraill; gweithredu'n anonest gyda'r bwriad o dwyllo; tarfu ar gyfleoedd cyfartal, lle diogel, diogelu, dim platfform neu staffio.

Mae gan y Swyddog Etholiadau'r hawl, ar unrhyw adeg, i wahardd ymgeisydd dros dro, er mwyn cynnal ymchwiliad parthed y rheolau ymddygiad, a allai beri i'r ymgeisydd gael ei wahardd yn barhaol o'r etholiad

Hyfforddiant ar gyfer ymgeiswyr llwyddiannus

Mae UCM yn credu mewn cynnig cefnogaeth i'w swyddogion a'i wirfoddolwyr. O'r herwydd, byddwn yn darparu ystod o hyfforddiant a phrosesau sefydlu ar gyfer yr ymgeiswyr llwyddiannus. Caiff pob ymgeisydd llwyddiannus ei hysbysu ynglŷn â dyddiadau unrhyw raglenni hyfforddi a sefydlu perthnasol, a bydd disgwyl iddynt fynychu'r rhain.

Monitro amrywioldeb

Mae'r Prif Swyddog Etholiadau'n awyddus i sicrhau bod y prosesau etholiadol hyn mor agored â phosibl i amrywioldeb llawn ein haelodaeth. Os yw eich enwebiad yn llwyddiannus, byddwn yn cysylltu â chi i gwblhau ffurflen fonitro amrywioldeb, sy'n ddewisol.





Undeb Cenedlaethol y Myfyrwyr

2il Lawr, Adeiladau Cambrian

Sgwâr Mount Stuart

Caerdydd CF10 5FL

t 0292 0435 390

www.nusconnect.org.uk

Am ymholiadau cyffredinol ynglŷn â'r
digwyddiad cysylltwch ag:

e events@nus.org.uk

Am gynnwys y gynhadledd, trefniannau
democrataidd ac ymholiadau etholiadol
cysylltwch ag:

e conference@nus-wales.org.uk



National Union of Students Wales

Second Floor, Cambrian Buildings

Mount Stuart Square

Cardiff CF10 5FL

t 0292 0435 390

www.nusconnect.org.uk

For general event enquiries contact:

e events@nus.org.uk

For content of the conference, democratic
procedures and elections enquiries contact:

e conference@nus-wales.org.uk

ucm *cymru*

undeb cenedlaethol y myfyrwyr

nus *wales*

national union of **students**

